




Broj/Broj: 01/7-50-1-52-2-24/05
Sarajevo/Capajevo: 09.02.2005.



ZAPISNIK

sa 24-e sjednice Administrativne komisije Predstavničkog doma Parlamentarne skupštine Bosne i Hercegovine, održane u prostorijama institucija Bosne i Hercegovine dana 09.02.2005. godine, sa početkom u 12,30 sati. Sjednica je završena u 14,15 sati.

PRISUTNI ČLANOVI KOMISIJE: Vinko Zorić, Senija Kapetanović, Mubera Ušanović, Jozo Križanović, Momčilo Novaković, Nikola Špirić, Ivo Miro Jović;

OPRAVDANO ODSUTNI ČLANOVI KOMISIJE: Dušanka Majkić, Hazim Felić;

OSTALI PRISUTNI: Vedran Hadžović, sekretar Zajedničke službe Sekretarijata Parlamentarne skupštine Bosne i Hercegovine;

Dvadeset četvrtom sjednicom Administrativne komisije Predstavničkog doma Parlamentarne skupštine Bosne i Hercegovine **predsjedavao je Vinko Zorić, prvi zamjenik predsjedavajućeg Administrativne komisije Predstavničkog doma Parlamentarne skupštine Bosne i Hercegovine.**

Za sjednicu je predložen sljedeći

DNEVNI RED:

1. Usvajanje Zapisnika sa 23-e sjednice Administrativne komisije;
2. Razmatranje Dopisa Ustavno-pravne komisije, broj: 01/1-50-1-85-39/05 od 11.01.2005. godine, u skladu sa Zaključkom sa 22-e sjednice Administrativne komisije;
3. Razmatranje Izvještaja o radu Administrativne komisije za period od 01.07. do 31.12.2004. godine;
4. Donošenje programa rada Administrativne komisije za 2005-u godinu;
5. Razmatranje Zahtjeva za dodjelu novčane pomoći zbog smrti člana uže porodice poslanika Seade Palavrić;

6. Razmatranje Zahtjeva za profesionalizaciju radnog odnosa u Parlamentarnoj skupštini Bosne i Hercegovine poslanika Senije Kapetanović;
7. Razmatranje Zahtjeva za odobrenje naknade za odvojeni život i smještaj poslanika Senije Kapetanović;
8. Razmatranje Zahtjeva za utvrđivanje iznosa naknade za korištenje mobilnog telefona u službene svrhe savjetnika Davorina Semenika i Sretka Bursaća;
9. Informacija o Odluci Doma naroda o odobravanju isplate naknade za rad privremeno raspoređenim sekretarima zajedničkih komisija i delegacija Parlamentarne skupštine Bosne i Hercegovine, broj: 02/3-50-1-53-6-23/04 od 29.12.2004. godine;
10. Izbor predsjedavajućeg Administrativne komisije Predstavničkog doma Parlamentarne skupštine Bosne i Hercegovine;
11. Izbor drugog zamjenika predsjedavajućeg Administrativne komisije Predstavničkog doma Parlamentarne skupštine Bosne i Hercegovine;
12. Razno.

Dvadeset četvrtu sjednicu Administrativne komisije Predstavničkog doma Parlamentarne skupštine Bosne i Hercegovine otvorio je predsjedavajući sjednicom Vinko Zorić i pozvao prisutne članove Administrativne komisije da se izjasne o predloženom dnevnom redu, odnosno da daju svoje primjedbe, prijedloge i sugestije.

Nakon iznesenog prijedloga dnevnog reda, Jozo Križanović predložio je dopunu dnevnog reda, odnosno da se u okviru tačke **AD-12 Razno uvrsti tačka a) Razmatranje Dopisa Šefa INDOK službe Parlamentarne skupštine Bosne i Hercegovine od 20.decembra 2004. godine.**

S obzirom da nije bilo drugih prijedloga, primjedbi i sugestija, dnevni red je sa predloženom dopunom dat na glasanje. Prisutni sjednici jednoglasno su usvojili dnevni red sa predloženom dopunom.

Nakon usvajanja dnevnog reda dvadeset četvrte sjednice Administrativne komisije Predstavničkog doma Parlamentarne skupštine Bosne i Hercegovine, pristupilo se njegovom razmatranju po utvrđenim tačkama.

AD-1 Zapisnik sa 23-e sjednice Administrativne komisije Predstavničkog doma Parlamentarne skupštine Bosne i Hercegovine usvojen je jednoglasno.

AD-2 Uvodno izlaganje po ovoj tački dnevnog reda dao je Vinko Zorić. Informirao je prisutne o razgovoru sa predsjedavajućim Ustavno-pravne komisije, te na osnovu istog iznio prijedlog da se predloži Ustavno-pravnoj komisiji Predstavničkog doma Parlamentarne skupštine Bosne i Hercegovine da se razmatranje Prijedloga Zakona o pravima i dužnostima članova Parlamentarne skupštine Bosne i Hercegovine prolongira za narednu sjednicu Ustavno-pravne komisije s obzirom da je u Administrativnoj komisiji došlo do izmjene određenog broja članova. Između ostalog, iznio je stav predsjedavajućeg Ustavno-pravne komisije da je imenovani spremjan po dobijenom mišljenju Administrativne komisije naložiti Istraživačkom direktorijumu kao NGOSu da istraži oblast koja se uređuje citiranim Zakonom. Prisutnim članovima je, na osnovu uvodnog izlaganja, iznio također svoj stav da je on za to da se urede prava i dužnosti poslanika i delegata jednim zakonom, koji će uređivati pitanje njihovih plaća, penzija i ostalih naknada. Posebno je naglasio činjenicu da se o Zakonu nije ni progovorilo, a u "Oslobodenju" od 09.02.2005. godine osvanuo je naslov koji se dotiče te materije. Na osnovu navedenog, a u vezi sa njegovim prijedlogom o prolongiranju ove tačke sa dnevnog reda Ustavno-pravne komisije za narednu sjednicu s obzirom na nove članove Mubera Ušanović, Seniju Kapetanović, Dušanka Majkić i Nikolu Špirića kojim treba vremena da se

upoznaju sa navedenim Zakonom, pozvao je prisutne članove Komisije da o ovom pitanju zauzmu svoj stav.

Nakon uvodnog izlaganja predsjedavajućeg sjednicom, za riječ se javio Nikola Špirić istakavši da proceduru po navedenom Zakonu treba završiti. Posebno je naglasio da je za svaku pohvalu to što je Komisija izašla sa svojim prijedlogom i da on ne misli da NGOs treba uređivati prava poslanika i delegata. U svojem izlaganju dodao je da se slaže sa gosp. Vinkom Zorićem kad se radi o pravu poslanika i delegata na plaću i s tog aspekta smatra da Parlamentarna skupština Bosne i Hercegovine treba da ima snage o tom pitanju braniti svoj stav. Istakao je da Administrativna komisija traži od Ustavno-pravne komisije da kaže svoje mišljenje kao nadležna komisija, a ne da Ustavno-pravna komisija usmjerava, u vezi sa navedenim Zakonom, Administrativnu komisiju da pročita materijal koji je u prilogu Dopisa.

Nakon ovog izlaganja predsjedavajući sjednicom Vinko Zorić je, govoreći teoretski, postavio pitanje odbrane Zakona od strane predлагаča gdje isti brani Zakon, a da se pri tome može desiti da isti neko iz Komisije predлагаča ne prihvaca. Istakao je da se od njega očekuje da u petak 11.02.2005. godine dođe na sjednicu Ustavno-pravne komisije ispred predлагаča, a da on na sjednicu neće ići s obzirom da će ići novoizabrani predsjedavajući Administrativne komisije. Ponovo je naglasio da je on za to kako odluči parlamentarna većina.

Pošto je predsjedavajući sjednicom iznio dodatno obrazloženje uz svoj prijedlog, za riječ se javio Momčilo Novaković. Istakao je da, ako se pročitaju neki dopisi u prilogu Dopisa Ustavno-pravne komisije, onda je evidentno da niko nije rekao u tim dopisima da jedan ovakav zakon nije potreban, a posebno naglasio da je i Predsjedništvo Bosne i Hercegovine za to da se donese jedan ovakav zakon. Posebno je naglasio činjenicu da je u određenoj proceduri donesen u određenom tekstu Zakon, pa i ovu činjenicu treba imati u vidu tako da nije potrebno nikakvo skrivanje za NGOsOM. S tim u vezi je naglasio da je bio na Ustavno-pravnoj komisiji, pa s toga smatra da je nakaradna formulacija u Dopisu Ustavno-pravne komisije vezano za neprimjeren stav Vijeća ministara, Foruma parlamentaraca budući da je u pitanju klima koja je tad vladala povodom ovog Zakona. Iz navedenih razloga imenovani je istakao da nije za to da utvrđena prava ovim Zakonom budu veća od prava u drugim parlamentima susjednih zemalja, ali nije ni za to da ta prava budu manja, pa iz navedenih razloga ostaje kod toga da treba donijeti zakon, posebno imajući u vidu plaću zamjenika direktora Uprave za indirektno oporezivanje i sličnih institucija.

Na ovo izlaganje Nikola Špirić je iznio podatak vezan za Vijeće ministara gdje se svaki rad u internoj komisiji naplaćuje dok to nije slučaj i u Parlamentarnoj skupštini Bosne i Hercegovine.

Momčilo Novaković je nadalje u svojoj diskusiji istakao da je smiješno to što se kritiziraju prava poslanika i delegata koja su inače po osnovu radnog odnosa dostupna svim koji su u radnom odnosu, dakle, radnicima i koji ih ostvaruju po osnovu tog odnosa u zakonskim okvirima. Sa aspekta obraćanja Ustavno-pravne komisije Administrativnoj komisiji, istakao je radi upoznavanja novih članova Administrativne komisije da je Kolegij kao nadležnu komisiju za ovaj Zakon odredio Ustavno-pravnu komisiju.

Na ovu informaciju reagirao je Nikola Špirić pitanjem zašto je Ustavno-pravna komisija određena kao nadležna komisija.

Nakon ovih diskusija, za riječ se javio Jozo Križanović i naglasio da je krajnje vrijeme da se doneše jedan ovakav zakon. Podsjetio je prisutne da su Prijedlog zakona utvrđile obje Komisije, a da je Zakon zamrznut oko godinu dana. Istakao je da smatra da je dobro ostati pri prijedlogu predsjedavajućeg sjednicom Administrativne komisije da se u petak zatraži prolongiranje razmatranja ovog Zakona na Ustavno-pravnoj komisiji, a posebno zbog personalnih promjena u Administrativnoj komisiji. Mišljenja je da bi bilo dobro saznati šta o svemu misli Komisija za finansijske i administrativne poslove Doma naroda. Nadalje je upoznao prisutne s činjenicom da i kad se usvoji navedeni Zakon, s njim neće biti riješena sva pitanja jer će mnogo toga ostati što treba riješiti drugim zakonima. Podsjetio je prisutne i na činjenicu da Vijeće ministara nije, i pored zaključka Predstavničkog doma Parlamentarne skupštine Bosne i Hercegovine, ništa učinilo o pitanju plaća budžetskih korisnika, a da će se materija koja nije riješena ovim Zakonom i dalje morati uređivati odlukama što je suprotno intenciji da se ova materija rješava zakonom, a ne

odlukama. Rekao je da smatra da je potrebno neke odredbe u Zakonu korigirati kako ne bi u parlamentarnoj proceduri proizvele veliki broj amandmana. Upozorio je prisutne da se, u pogledu penzijsko-invalidiskog osiguranja, značajno odstupilo od postojecih entiteskih rješenja. U skladu s navedenim, imenovani je istakao da je on za to da se stvari urede Zakonom, ali da se Komisije ponovo sastanu i preispitaju svoj prijedlog, odnosno vide da li u Prijedlogu Zakona treba nešto mijenjati. Iznio je i sugestiju da Administrativna komisija ispita mogućnost da se o ovom pitanju apelira na Vijeće ministara kako bi ono pristupilo izradi Zakona.

Nakon ove diskusije, za riječ se javila Senija Kapetanović i istakla da se slaže sa izlaganjima prethodnika, ali da joj je ostalo nejasno po kom osnovu je Administrativna komisija pozvana na sjednicu Ustavno-pravne komisije, odnosno ko je dao Prijedlog Zakona. Naglasila je da u svakom slučaju podržava gosp. Jozu Križanovića kad se radi o usaglašavanju Zakona sa entitetskim rješenjima, ali i da stoji činjenica da su poslanici i delegati određena kategorija ljudi kad se radi o njihovim pravima i obavezama, pa se i s tog aspekta može braniti Prijedlog Zakona. Posebno je istakla da u Prijedlogu Zakona стоји неšto što se odnosi na poslanike i delegate dva doma, pa bi možda s tog aspekta u Prijedlogu trebalo korigirati da se radi o licima izabranim na izborima, tako da bi tu bilo Predsjedništvo Bosne i Hercegovine, ali ne i Vijeće ministara Bosne i Hercegovine.

Pojašnjenje vezano za navedene kategorije dao je Vinko Zorić istakavši da je u prvobitnom Prijedlogu Zakona bilo i Predsjedništvo Bosne i Hercegovine, ali da oni nisu pristali na to tako da su te odredbe korigirane.

Na ovo pojašnjenje Senija Kapetanović upozorila je na činjenicu da Predsjedništvo Bosne i Hercegovine nije reklo da ono neće da se njihova pitanja urede ovim Zakonom, već da su pitali zašto Zakonom nije obuhvaćeno i Vijeće ministara. Ponovo je istakla da je logično da se doneše ovakav Zakon, pa s toga smatra da ga treba kao takvog i podržati, s tim da smatra da Zakon treba usmjeriti ka komisijama, kako bi one razgovarale o Prijedlogu Zakona i profilirale ga i tako definiranog uputile ka Ustavno-pravnoj komisiji.

Na ovo izlaganje Vinko Zorić je istakao da je raspoloženje da se navedeni Zakon doneše ove godine, a ne dogodine imajući u vidu predstojeće izbore. Ponovo je naglasio da je opći stav da poslanici i delegati nisu za to da imaju više od drugih poslanika i delegata u okruženju, ali ni manje. Potvrdio je svoj stav da sa citiranim Zakonom treba ići u parlamentarnu proceduru, pa imajući to u vidu, preložio je da se ispred Administrativne komisije imenuju na današnjoj sjednici dva do tri člana koji će braniti Prijedlog Zakona pred Ustavno-pravnom komisijom, uključujući, ako je potrebno i djelovanje sa amandmanima. Pozvao je ujedno prisutne da se izjasne da li će se ići na Ustavno-pravnu komisiju, zakazanu za petak 11.02.2005. godine, sa stanovištem da se ne odustaje od Prijedloga Zakona ili da se zakaže zajednička sjednica Komisije za finansijske i administrativne poslove Doma naroda i Administrativne komisije samo s jednom tačkom dnevnog reda, a to je razmatranje Prijedloga Zakona.

Nakon ovog izlaganja za riječ se javio Nikola Špirić i podsjetio prisutne da je navedeni Zakon ušao u parlamentarnu proceduru, pa je imajući to vidu predložio da na sjednicu Ustavno-pravne komisije ide predsjedavajući Administrativne komisije budući da je u ovoj fazi, u kojoj se nalazi citirani Zakon, neuobičajeno da se on vraća na komisije.

Na ovo izlaganje je Vinko Zorić ponovo podsjetio prisutne da je malo vremena do petka za svakog ko će ispred Administrativne komisije braniti Zakon.

Na ovu primjedbu Nikola Špirić predložio je da se prihvati prijedlog da citirani Zakon ide na narednu sjednicu Ustavno-pravne komisije ističući da je potrebno imati u vidu da je Zakon u parlamentarnoj proceduri. Informirao je prisutne o činjenici da je Dom naroda u parlamentarnoj proceduri vezanoj za ovaj Zakon otišao dalje, pa ga je razmatrao u prvom čitanju i usvojio određene amandmane.

U diskusiju o ovom pitanju ponovo se uključio Momčilo Novaković i skrenuo pažnju prisutnima da ne treba trošiti vrijeme na ovakve rasprave imajući u vidu činjenicu da je Ustavno-pravna komisija Predstavničkog doma također raspravljala o amandmanima. U skladu s tim je naglasio da je potrebno obavijestiti Ustavno-pravnu komisiju da iz navedenih razloga Prijedlog

Zakona treba raspravljati u parlamentarnoj proceduri, a ne na sjednici zakazanoj za petak 11.02.2005. godine.

Vinko Zorić je dodao da je potrebno sugerirati Ustavno-pravnoj komisiji da obavijesti poslanike da je u toku amandmanska faza i ,imajući to u vidu, dati primjeran rok u kojem bi se mogli ulagati amandmani na navedeni Zakon. U skladu s navedenim, predložio je da se ispred Administrativne komisije uputi dopis Ustavno-pravnoj komisiji u kojem će se navesti da Zakon ide u proceduru, a da se poslanici obavijeste do kada teče amandmanska faza uključujući i prijedlog da se Prijedlog Zakona razmatra na narednoj sjednici Ustavno-pravne komisije.

Govoreći o ovom pitanju, Jozo Križanović je istakao da je Zakon ušao u parlamentarnu proceduru, pa je predložio da se Administrativna komisija izjasni, u formi zaključaka, na Dopis Ustavno-pravne komisije, posebno ističući zaključke Ustavno-pravne komisije i amandmane Mirsada Ćemana. Podržao je također jedan zaključak u vezi sa pomjeranjem ove tačke dnevnog reda Ustavno-pravne komisije za narednu sjednicu.

Replicirao mu je Nikola Špirić pitanjem zašto je potrebno da se Administrativna komisija izjasni s obzirom da je nadležna Ustavno-pravna komisija.

O tom pitanju Vinko Zorić je predložio da, ukoliko se radi o Forumu parlamentaraca, onda neka ih neko u proceduri uvrsti u Zakon putem amandmana.

Momčilo Novaković podržao je ova izlaganja i istakao da bi trebalo da bude odgovor Administrativne komisije da je za nju Zakon u proceduri.

Vinko Zorić se ponovo obratio prisutnim prijedlogom da predstavnik Administrativne komisije usmeno obavijesti Ustavno-pravnu komisiju o naprijed navedenom.

Nikola Špirić je u vezi s tim naglasio da je potrebno svim poslanicima dati Dopis Ustavno pravne komisije od 11.01.2005. godine.

Jozo Križanović je u vezi s tim naglasio da je potrebno istaći da Administrativna komisija traži rok u kojem bi se omogućila amandmanska faza, a da se razmatranje Zakona na Ustavno-pravnoj komisiji odgodi za narednu sjednicu.

Pošto je zaključena diskusija o ovoj tački dnevnog reda, Administrativna komisija jednoglasno je donijela

ZAKLJUČAK

Zakonodavnu proceduru Prijedloga Zakona o pravima i dužnostima članova Parlamentarne skupštine Bosne i Hercegovine treba nastaviti.

S obzirom na dugo vremensko mirovanje Prijedloga Zakona o pravima i dužnostima članova Parlamentarne skupštine Bosne i Hercegovine, Administrativna komisija smatra da je potrebno da nadležna komisija odredi rok za amandmansku fazu i o istom obavijesti sve poslanike Predstavničkog doma Parlamentarne skupštine Bosne i Hercegovine.

Administrativna komisija preporučuje da Ustavno-pravna komisija Predstavničkog doma Parlamentarne skupštine Bosne i Hercegovine, kao nadležna komisija, dostavi svim poslanicima Predstavničkog doma Parlamentarne skupštine Bosne i Hercegovine Dopis, broj: 01/7-50-1-85-39/05 od 11.01.2005. godine, na znanje.

Administrativna komisija predlaže da se Prijedlog Zakona o pravima i dužnostima članova Parlamentarne skupštine Bosne i Hercegovine, koji je na dnevnom redu 41-e sjednice Ustavno-pravne komisije Predstavničkog doma Parlamentarne skupštine Bosne i Hercegovine zakazane za 11.02.2005. godine, pod tačkom Ad-5, uvrsti na dnevni red naredne sjednice Ustavno-pravne komisije Predstavničkog doma Parlamentarne skupštine Bosne i Hercegovine, kako bi predlagač Zakona dobio dovoljno vremena da se pripremi za raspravu s obzirom da je u Administrativnoj komisiji u međuvremenu došlo do izmjene određenog broja članova.

AD-3 Uvodno izlaganje o ovoj tački dnevnog reda dao je Vinko Zorić i predložio da se Izvještaj o radu Administrativne komisije za period od 01.07. do 31.12.2004. godine prihvati, te kao takav uputi prema Predstavničkom domu Parlamentarne skupštine Bosne i Hercegovine.

Pošto nije bilo diskusija o ovoj tački dnevnog reda, prisutni članovi Administrativne komisije jednoglasno su usvojili

ZAKLJUČAK

Usvaja se Izvještaj o radu Administrativne komisije za period od 01.07. do 31.12.2004. godine.

Pošto je zaključena **tačka AD-3** dnevnog reda, prisutni članovi Administrativne komisije su se ponovo u diskusiji vratili na **tačku AD-2** dnevnog reda.

Jozo Križanović predložio je, vrativši se na tačku AD-2 dnevnog reda, da se jednim zaključkom ide prema Vijeću ministara Bosne i Hercegovine imajući u vidu da će neka pitanja ostati neriješena navedenim Zakonom i da to treba imati u vidu.

Momčilo Novaković je ponovo istakao da će se raspravljati o Zakonu i da tad treba davati i odredene primjedbe.

Nakon ovih diskusija za riječ se javio Vedran Hadžović, sekretar Zajedničke službe Sekretarijata Parlamentarne skupštine Bosne i Hercegovine, i sugerirao prisutnim članovima Administrativne komisije da mogu predložiti Ustavno-pravnoj komisiji da obaveže Vijeće ministara da ažurira svoj rad, odnosno da pokrene pitanje izrade zakona od strane Vijeća ministara kako je to utvrđeno zaključkom Predstavničkog doma Parlamentarne skupštine Bosne i Hercegovine.

Nakon ovog izlaganja za riječ se javio Nikola Špirić i naglasio da je Predstavnički dom Parlamentarne skupštine stariji, pa s toga treba ići prema njemu vezano za zaključak sa 33-e sjednice i obavezu Vijeća ministara.

Nakon ovih izlaganja, Administrativna komisija je, u okviru tačke AD-2, naknadno jednoglasno usvojila

ZAKLJUČAK

Administrativna komisija Predstavničkog doma Parlamentarne skupštine Bosne i Hercegovine, s obzirom na činjenicu da Vijeće ministara Bosne i Hercegovine nije do 30.09.2004. godine dostavilo u parlamentarnu proceduru Prijedlog Zakona o plaćama i ostalim naknadama budžetskih korisnika na nivou Bosne i Hercegovine, predlaže Predstavničkom domu Parlamentarne skupštine Bosne i Hercegovine da doneše zaključak kojim će od Vijeća ministara Bosne i Hercegovine zatražiti da se izjasni o navedenom Zakonu.

AD-4 Po ovoj tački dnevnog reda, pošto je predsjedavajući sjednicom dao uvodno izlaganje, Vedran Hadžović je predložio da se briše tačka 2., s obzirom da je donošenje navedenog akta u nadležnosti Kolegija Predstavničkog doma Parlamentarne skupštine Bosne i Hercegovine.

Za riječ se javila Senija Kapetanović i predložila da se redoslijed donošenja akata uskladi i sistematizira prema predloženim rokovima.

Pošto nije bilo više primjedbi i sugestija na Orijentacioni plan rada Administrativne komisije za 2005-u godinu, isti je dat na glasanje s navedenim primjedbama. Pristni članovi Administrativne komisije jednoglasno su usvojili

ORIJENTACIONI PLAN RADA ZA 2005.

NORMATIVNE AKTIVNOSTI u 2005-oj

U skladu sa Zaključkom, od 28.12.2004. godine, sa 23-e sjednice i Izvještajem Ureda za reviziju, u 2005-oj godini Administrativna komisija zajedno sa Komisijom za finansijske i administrativne poslove Doma naroda planira donošenje:

1. Odluke o izmjenama i dopunama Pravilnika o plaćama i nadoknadama državnih službenika i namještenika u Sekretarijatu Parlamentarne skupštine Bosne i Hercegovine, broj: 01,02/7-02-289/00 od 23.novembra 2000. godine. (Sekretari komisija su zajedno sa stručnim službama Sekretarijata Parlamentarne skupštine Bosne i Hercegovine na sjednici održanoj 19.07.2004 izvršili uskladivanje **Pravilnika o plaćama i nadoknadama državnih službenika i namještenika u Sekretarijatu Parlamentarne skupštine Bosne i Hercegovine** sa zakonskim rješenjima. Na osnovu toga su predložili izmjene i dopune citiranog akta. Citirana odluka se nalazi u razmatranju pred Komisijama oba doma.);

ROK: 30.04.2005.

2. **Prečišćenog teksta** Pravilnika o plaćama i nadoknadama državnih službenika i namještenika u Sekretarijatu Parlamentarne skupštine Bosne i Hercegovine;

ROK: 30.04.2005.

Dok se ne riješi pitanje plaća i ostalih materijalnih prava poslanika i delegata u Parlamentarnoj skupštini Bosne i Hercegovine, planira se donošenje:

3. Odluke o izmjenama i dopunama Odluke o načinu obračuna plaća i ostalih materijalnih prava poslanika i delegata u Parlamentarnoj skupštini Bosne i Hercegovine, broj: 01,02/7-126/00 od 11. aprila 2000. godine;

ROK: 30.05.2005

4. **Prečišćenog teksta** Odluke o načinu obračuna plaća i ostalih materijalnih prava poslanika i delegata u Parlamentarnoj skupštini Bosne i Hercegovine, broj: 01,02/7-126/00 od 11. aprila 2000. godine;

ROK: 30.05.2005.

5. **Pravilnika o načinu i uvjetima korištenja internih i eksternih usluga- reprezentacije, PTT usluga, službenog vozila, službene odjeće i štampe u Parlamentarnoj skupštini Bosne i Hercegovine;**

ROK: 30.06.2005.

Kao poseban prioritet nameće se donošenje zakona kojim će se urediti plaće i ostala materijalna prava poslanika i delegata u Parlamentarnoj skupštini Bosne i Hercegovine. U

tom smislu Administrativna komisija će raditi u 2005-oj godini kako bi se navedeni zakon donio;

ROK: 31.12.2005.

Pored navedenih normativnih akata, Administrativna komisija će uzeti u razmatranje i donošenje, po potrebi, i svih drugih akata koje, joj stručne službe Sekretarijata Parlamentarne skupštine Bosne i Hercegovine dostave.

BUDŽET 2005-e

U okviru svojih redovnih aktivnosti, Administrativna komisija će sa nadležnom komisijom Doma naroda Parlamentarne skupštine Bosne i Hercegovine pratiti izvršenje Budžeta za 2005-u godinu, te poduzimati sve neophodne mjere kako se ne bi prekoračila budžetom odobrena sredstva.

OSTALE AKTIVNOSTI

Administrativna komisija će i u 2005-oj godini nastojati da redovne aktivnosti iz svojeg djelokruga rada obavlja stručno i efikasno.

Administrativna komisija će i u 2005-oj godini nastojati da ona pitanja koja su u njenoj nadležnosti i Komisije za finansijske i administrativne poslove Doma naroda Parlamentarne skupštine Bosne i Hercegovine budu stavljena na dnevni red zajedničkih sjednica, posebno se zalažeći za njihovo efikasno i pravovremeno rješavanje.

U skladu sa naprijed navedenim, Administrativna komisija se založila za formiranje jedinstvene Administrativne komisije što bi po njenom mišljenju doprinijelo efikasnosti u radu, pa se u tom smislu misli posebno angažovati u 2005-oj godini.

AD-5 Po ovoj tački dnevnog reda nije bilo diskusije. Prisutni članovi Administrativne komisije jednoglasno su donijeli

ODLUKU o dodjeli novčane pomoći

I

Poslaniku Seadi Palavrić, zbog smrti člana uže porodice, dodjeljuje se novčana pomoć u iznosu tri mjesečne plaće iplaćene u prethodna tri mjeseca.

II

Za realizaciju ove Odluke zadužuje se Računovodstvo Sekretarijata Parlamentarne skupštine Bosne i Hercegovine.

III

Odluka stupa na snagu danom donošenja.

AD-6 Po ovoj tački dnevnog reda nije bilo diskusije. Prisutni članovi Administrativne komisije jednoglasno su donijeli

**ODLUKU
o prijemu poslanika u stalni radni profesionalni odnos**

I

Senija Kapetanović, poslanik u Predstavničkom domu Parlamentarne skupštine Bosne i Hercegovine, prima se u stalni radni profesionalni odnos, sa danom 01.01.2005.godine.

II

Odluka stupa na snagu danom donošenja, a primjenjivat će se od 01.01.2005. godine.

AD-7 Po ovoj tački dnevnog reda nije bilo diskusije. Prisutni članovi Administrativne komisije jednoglasno su donijeli

RJEŠENJE

1. Seniji Kapetanović, poslaniku u Predstavničkom domu, odobrava se naknada za odvojeni život od porodice u iznosu od 400,00 KM mjesečno i naknada za zakup stana do 500,00 KM mjesečno, kao i pravo na naknadu troškova prijevoza, četiri puta mjesečno, do mjesta prebivališta njene porodice.

2. Visina naknade za zakup stana regulisat će se ugovorom o zakupu.
3. Rješenje će se primjenjivati od 01.01.2005. godine.

AD-8 Prije prelaska na raspravu po ovoj tački dnevnog reda sekretar Administrativne komisije Davorka Čaplinski upoznala je prisutne članove Administrativne komisije s reakcijom novinara na zahtjev savjetnika da im se odobri naknada za korištenje mobilnog telefona u službene svrhe. Posebno je naglasila insistiranje novinara "Oslobođenja" da mu se dostavi materijal za ovu tačku dnevnog reda, te pozivanje istog na gosp. Zorića. U skladu s navedenim, zamolila je prisutne članove da, u situacijama kada daju intervju, novinare za određeni materijal upućuju na Odjel za odnose s javnošću, a ne na sekretara Administrativne komisije kako bi se izbjegli nepotrebni nesporazumi i pritisci.

Pošto su navedenu informaciju primili k znanju na Komisiji nije bilo rasprave o tom pitanju. Izraženo je mišljenje da je potrebno saradivati s medijima, kao i nastojati biti transparentan kad se radi o dnevnom redu i materijalu za dnevni red.

Nakon završene informacije vezane za ovu tačku dnevnog reda, pristupilo se njenom razmatranju. Uvodno izlaganje o ovoj tački dnevnog reda dao je Vinko Zorić postavivši pitanje u vezi s materijalom zašto je ministar jednog ministarstva važniji od predsjedavajućeg jednog doma, ako se uzmu u obzir naknade za korištenje mobitela u ministarstvu koje je dato kao uzor i predsjedavajućih domova.

U vezi s ovom tačkom dnevnog reda, Jozo Križanović želio se informirati čiji su savjetnici podnosioci molbe, te da li su jedini savjetnici s obzirom da postoji praksa da se jedno pitanje ne rješava u cjelini za određenu kategoriju ljudi već se ide na pojedinačne zahtjeve. Pošto je upoznat s tim da postoji šest savjetnika iznio je mišljenje da se treba rješavati pitanje naknade za korištenje mobitela u službene svrhe za sve savjetnike, a ne samo za one koji su podnijeli zahtjev.

Na osnovu ovog izlaganja, predsjedavajući sjednicom Vinko Zorić predložio je da se razmatranje ovog zahtjeva odgodi za narednu sjednicu kada bi se moglo na osnovu podataka o broju savjetnika generalno odlučiti o njihovim naknadama.

Momčilo Novaković podsjetio je prisutne da se skoro na svakoj drugoj sjednici postavlja pitanje naknada, pa stoga ovo pitanje treba rješavati na taj način da Administrativna komisija svojim rješenjem odluči za cijelu oblast PTT troškova u Parlamentarnoj skupštini Bosne i Hercegovine.

Predsjedavajući sjednicom Vinko Zorić je govoreći o ovom pitanju ponovo naglasio Odluku o izmjenama i dopunama Odluke o načinu obračuna plaća i ostalih materijalnih prava poslanika i delegata u Parlamentarnoj skupštini Bosne i Hercegovine kojom je utvrđeno pravo na naknadu za korištenje mobitela, pa imajući u vidu njene odredbe upitao se da li treba raspravljati o tom pitanju s obzirom da mu se čini apsurdnim upućivanje zahtjeva za naknadu, posebno ako se zna da ni on kao ni mnogi poslanici te predsjedavajući domova ne traže to pravo bilo da se radi da ga uopće nemaju ili da im troškovi prelaze utvrđene iznose kao što je to slučaj sa nekim predsjedavajućim i zamjenicima predsjedavajućih domova. U skladu s materijalom za navedenu tačku dnevnog reda, istakao je da se može raspravljati o tom pitanju u pravcu da li savjetnici treba da imaju to pravo ili ne.

Nakon ovog izlaganja, za riječ se javio Ivo Miro Jović i usmjerio prisutne na Orientacioni radni plan gdje je pod tačkom 1. utvrđeno donošenje akta kojim se, između ostalog, rješava pitanje naknada za PTT troškove uopće, pa s toga aspekta samo treba raspraviti pitanje da li će se i savjetnicima utvrditi to pravo kako bi se stav Administrativne komisije ugradio u navedeni akt. Posebno je istakao da će se, kad se bude raspravljalo o navedenom aktu, ovo pitanje naknada PTT troškova riješiti cijelovito, kako je to predlagao Momčilo Novaković, ali i ujedno riješiti pitanje pojedinačnih zahtjeva, kao što je to do sada bila praksa.

Na osnovu navedenog, prisutni članovi Administrativne komisije jednoglasno su donijeli

ZAKLJUČAK

Ova tačka dnevnog reda odgadala se za narednu sjednicu Administrativne komisije do kada će stručne službe Sekretarijata Parlamentarne skupštine Bosne i Hercegovine dostaviti podatke o savjetnicima, te uporedne pokazatelje za rješavanje naknada u drugim institucijama.

AD-9 Uvodno izlaganje za ovu tačku dnevnog reda dala je sekretar Komisije Davorka Čaplinski. Upoznala je prisutne s odlukom Doma naroda, te činjenicom da je Administrativna komisija na 23-oj sjednici odluku usvojila bez utvrđenih termina za svako radno mjesto na koje je postavljen privremeni sekretar. U skladu s navedenim, podsjetila je prisutne članove Administrativne komisije da je potrebno usaglasiti tekstove odluka na način kako je to predloženo u Informaciji uz materijal

za ovu tačku dnevnog reda. Na izlaganje Davorke Čaplinski o ovom pitanju Vedran Hadžović je dodao da su članovi Administrativne komisije u Informaciji dobili dvije solucije kako da postupe u ovom slučaju: ili da usvoje izmjene i dopune Odluke sa 23-e sjednice ili da po poslovničkoj proceduri izaberu usaglašavanje što podrazumijeva izbor komisije koja će s Komisijom za finansijske i administrativne poslove Doma naroda usaglasiti tekst citirane Odluke.

Nakon uvodnog izlaganja, Nikola Špirić istakao je da su u Odluci sporni datumi i da ne može biti licitiranja hoće li ili neće neko da radi, a vraćanje datuma na period do donošenja Odluke nema smisla.

Na ovu primjedbu Vedran Hadžović je istakao da u Sekretarijatu nema ljudi, a poslovi novoosnovanih komisija traže da se obavljaju tako da je najprihvatljivije rješenje u ovoj situaciji bilo da se imenuju privremeni sekretari i da im se za njihov rad daju određene naknade.

Na ovo objašnjenje reagirao je Nikola Špirić istakavši da ti ljudi obavljaju poslove privremenih sekretara u okviru redovnog radnog vremena.

Vedran Hadžović je naveo da će se imenovanim dati 10% na plaću, a da se za to tražilo i dobilo odobrenje od Vijeća ministara, pa i s tog aspekta ne vidi ništa sporno kad se radi o navedenoj Odluci.

Pošto je završena rasprava po ovoj tački dnevnog reda, Vinko Zorić je ukazao na tehničku grešku koju u Odluci treba ispraviti s obzirom da septembar ima 30, a ne 31 dan, te ju dao na glasanje. Prisutni članovi Administrativne komisije jednoglasno su usvojili

ODLUKU

o dopuni Odluke o odobravanju isplate naknade za rad privremeno raspoređenim sekretarima zajedničkih komisija i delegacija Parlamentarne skupštine Bosne i Hercegovine

I

U tački I Odluke o odobravanju isplate naknade za rad privremeno raspoređenim sekretarima zajedničkih komisija i delegacija Parlamentarne skupštine Bosne i Hercegovine, broj: 01/7-50-1-53-6-23/04 od 28.12.2004. godine, vrše se slijedeće dopune:

U stavu 1, tačka 1, iza riječi "integracije" dodaje se zagrada sa tekstom:

- (u 2004. godini: od 01.01. do 31.12., te u 2005. godini, do imenovanja stalnog sekretara).

Tački 2, iza riječi "Hercegovine" dodaje se zagrada sa tekstom:

- (u 2004. godini: od 01.01. do 31.12., te u 2005. godini, do imenovanja stalnog sekretara).

Tački 3, iza riječi "agencije" dodaje se zagrada sa tekstom:

- (u 2004. godini: od 01.05. do 31.12., te u 2005. godini, do imenovanja stalnog sekretara).

Tački 4, iza riječi "Evrope" dodaje se zagrada sa tekstom:

- (u 2004. godini: od 01.01. do 30.06., te u 2005. godini, do imenovanja stalnog sekretara).

Tački 5, iza riječi "Uniji" dodaje se zagrada sa tekstom:

- (u 2004. godini: od 01.01. do 30.09., te u 2005. godini, do imenovanja stalnog sekretara).

II

Odluka stupa na snagu danom donošenja.

AD-10 Uvodno izlaganje po ovoj tački dnevnog reda dao je Vinko Zorić, predsjedavajući sjednicom Administrativne komisije. Kao jedini kandidat za mjesto predsjedavajućeg Administrativne komisije predložena je gđa Senija Kapetanović. Prijedlog je dat na glasanje.

Prisutni članovi Administrativne komisije su sa 6 glasova "ZA" i jednim "UZDRŽAN," donijeli

ODLUKU

I

Gospođa Senija Kapetanović izabrana je za predsjedavajućeg Administrativne komisije Predstavničkog doma Parlamentarne skupštine Bosne i Hercegovine.

II

Odluka stupa na snagu danom donošenja.

AD-11 Uvodno izlaganje po ovoj tački dnevnog reda dao je Vinko Zorić, predsjedavajući sjednicom Administrativne komisije. Kao jedini kandidat za mjesto drugog zamjenika predsjedavajućeg Administrativne komisije predložena je gđa Dušanka Majkić. Prijedlog je dat na glasanje.

Prisutni članovi Administrativne komisije jednoglasno su donijeli

ODLUKU

I

Gospođa Majkić Dušanka izabrana je za drugog zamjenika predsjedavajućeg Administrativne komisije Predstavničkog doma Parlamentarne skupštine Bosne i Hercegovine.

II

Odluka stupa na snagu danom donošenja.

AD-12 a) Razmatranje Dopisa Šefa INDOK službe Parlamentarne skupštine Bosne i Hercegovine od 20.decembra 2004. godine.

Uvodno izlaganje po ovoj tački dnevnog reda dao je Jozo Križanović koji je upoznao prisutne članove Administrativne komisije sa citiranim dopisom. Ujedno je na Komisiji zatražio da mu se objasni ko su članovi Kolegija Sekretarijata. Zatražio je i objasnjenje za citirani Dopus, te predložio da se ovo pitanje sistemski riješi imajući u vidu neravnopravan položaj klubova, kao i činjenicu da neki klubovi dobijaju šest ili sedam novina, a neki klubovi ni jedne.

Nakon ovog izlaganja, za riječ se javio Vedran Hadžović i upoznao prisutne s nalazom revizora, te činjenicom da je sugerirano da klubovi iz svojih sredstava nabavljaju novine, kao i s prijedlogom Komisije za finansije i budžet o ovom pitanju.

Nikola Špirić je o ovom pitanju iznio stav da klubovi poslanika moraju imati jednak prava. Nadalje je naglasio da je Šef INDOK službe prekoračio svoja ovlaštenja s obzirom da je to pitanje u

nadležnosti Administrativne komisije, a da o ovom pitanju Administrativna komisija nije donosila odluku, pa se tu radi i o legalizaciji pristupa ovom rješenju.

Ivo Miro Jović je, imajući u vidu navedeno, predložio da se doneše privremena odluka kojom će se regulirati da svaki član Kolegija Sekretarijata ima pravo na jedne dnevne i jedne sedmične novine, kao i svaki Klub.

Na ovo izlaganje replicirao je Jozo Križanović i naglasio da su po citiranom Dopisu INDOK-a sekretari iznad Klubova poslanika. U skladu s navedenim, predložio je da se ovo pitanje riješi na način da će članovi Kolegija, sekretari domova i svaki Klub imati pravo na jedne dnevne i jedne sedmične novine.

Vedran Hadžović je po ovom pitanju ponovo pozvao prisutne da se ispoštuje nalaz Ureda za reviziju i njihova preporuka, tj. da se novine za potrebe klubova nabavljaju iz njihovih sredstava.

Nakon ovog izlaganja, Nikola Špirić je predložio da se zaduži Vedran Hadžović da provjeri za narednu sjednicu Administrativne komisije kako je INDOK služba utvrdila raspodjelu novina, te koliko novina dobivaju pojedini Klubovi.

U vezi s ovom tačkom dnevnog reda, Jozo Križanović upozorio je prisutne da, neovisno od preporuke revizije treba voditi računa o diskriminatornim efektima kad se radi o raspodjeli novina i činjenici da neki Klubovi dobivaju šest do sedam novina dok drugi ni jedne.

Pošto je završena rasprava o ovoj tački dnevnog reda, prisutni su jednoglasno donijeli

ZAKLJUČAK

Zadužuje se Vedran Hadžović sekretar Zajedničke službe Sekretarijata Parlamentarne skupštine Bosne i Hercegovine, da za narednu sjednicu Administrativne komisije provjeri podatak kako je INDOK služba izvršila raspored novina po Klubovima, kao i koliko dnevnih i sedmičnih novina primaju Klubovi poslanika.

Pred zaključenje ove sjednice Administrativne komisije, Vinko Zorić predložio je da se doneše zaključak kojim će se upozoriti Predstavnički dom Parlamentarne skupštine Bosne i Hercegovine na to da se, u skladu sa Ustavom Bosne i Hercegovine, nikakvim zakonima i Budžetom ne smiju umanjivati plaće poslanika.

Na navedeno izlaganje Nikola Špirić je dodao da se, ispred Administrativne komisije, prema Predstavničkom domu Parlamentarne skupštine Bosne i Hercegovine uputi zahtjev da Administrativna komisija traži da Predstavnički dom Parlamentarne skupštine Bosne i Hercegovine poštuje Ustav Bosne i Hercegovine kad se radi o plaćama poslanika.

Na osnovu navedenog, prisutni članovi Administrativne komisije jednoglasno su donijeli

ZAKLJUČAK

I

Administrativna komisija Predstavničkog doma Parlamentarne skupštine Bosne i Hercegovine skreće pažnju Predstavničkom domu Parlamentarne skupštine Bosne i Hercegovine na odredbu člana IX stav 2 Ustava Bosne i Hercegovine, koja glasi:

"Naknada za lica koja obavljaju funkcije u institucijama Bosne i Hercegovine ne može biti umanjena za vrijeme trajanja mandata nosioca funkcije."

Na osnovu naprijed navedenog, Administrativna komisija Predstavničkog doma Parlamentarne skupštine Bosne i Hercegovine smatra da odluke kojima se uređuju naknade za lica koja obavljaju funkcije u institucijama Bosne i Hercegovine moraju biti usaglašene sa citiranom ustavnom odredbom.

Pred završetak sjednice sekretar Administrativne komisije podsjetio je prisutne da je potrebno imenovati potpisnika zaključka vezanog uz tačku AD-2 s obzirom da je sjednica Ustavno-pravne komisije zakazana za petak 11.02.2005. godine, a da on treba biti dostavljen Ustavno-pravnoj komisiji prije početka ili na samoj sjednici, jer se traži skidanje s dnevnog reda jedne tačke i njeno prolongiranje za narednu sjednicu.

Nakon ovog izlaganja, prisutni članovi jednoglasno su donijeli

ZAKLJUČAK

Ovlašćuje se Ivo Miro Jović da potpiše Zaključak, broj: 01/7-50-1-52-2a-24/05 od 09.02.2005. godine.

Pošto je iscrpljen dnevni red, 24-a sjednica Administrativne komisije završena je u 14,15 sati.

Sekretar
Administrativne komisije
Davorka Čaplinski

Prvi zamjenik predsjedavajućeg
Administrativne komisije

Vinko Zorić
